



UMP dan Yayasan Sabah jalin hubungan kerjasama akademik

Universiti Malaysia Pahang (UMP) dan Yayasan Sabah (YS) memeterai jalinan kerjasama strategik dalam bidang pembangunan akademik terutamanya melibatkan tiga aspek utama iaitu menubuhkan Pusat Asasi (*Foundation Centre*), penawaran biasiswa dan felo yayasan ini.

Dengan hasrat menubuhkan Pusat Asasi di Kolej Yayasan Sabah, UMP pastinya dapat mempertimbangkan calon-calon yang disyorkan oleh Yayasan Sabah untuk didaftarkan ke program pengajian prasiswazah khususnya tiga program kejuruteraan kerjasama dari Karlsruhe University of Applied Science (HsKA) Jerman yang menawarkan program Dwijjazah.

la melibatkan program Sarjana Muda Kejuruteraan Perniagaan di Fakulti Pengurusan Industri (FPI) serta Sarjana Muda Kejuruteraan Mekatronik dan Kejuruteraan Automotif

yang ditawarkan di Fakulti Kejuruteraan Pembuatan (FKP).

Pada masa yang sama juga, kemasukan ke program-program pengajian prasiswazah lain yang turut ditawarkan di semua lapan fakulti yang ada di UMP akan turut dipertimbangkan kepada calon-calon yang disyorkan tersebut.

Menurut Naib Canselor UMP, Profesor Dato' Dr. Daing Nasir Ibrahim, UMP juga amat menghargai komitmen pihak Yayasan Sabah untuk mempertimbangkan tajaan biasiswa kepada pelajar cemerlang yang memenuhi kriteria kelayakan dan ditawarkan tempat untuk melanjutkan pengajian di peringkat prasiswazah di universiti ini.

"Selain itu, pertimbangan biasiswa dapat turut diberikan kepada calon-calon cemerlang yang ditawarkan tempat dalam program ijazah di lain-lain fakulti.

"Dalam konteks modal insan pula persefahaman yang dimeterai ini juga membolehkan UMP menilai calon-calon yang bersesuaian dan berkelayakan dari kalangan pelajar *fellowship* Yayasan Sabah untuk dipertimbangkan bagi maksud tawaran pekerjaan, terutamanya sebagai staf akademik di universiti ini, katanya berucap dalam Majlis menandatangani MoU antara UMP dan Yayasan Sabah di Hotel Ancasa Royale Pekan pada 28 November 2015 yang lalu.

Jelasnya, meniti tahun ke-13 penubuhan UMP sebagai sebuah Universiti Awam (UA), UMP kini tercabar untuk beroperasi dalam persekitaran yang lebih kompetitif dengan tidak hanya bergantung kepada sumber-sumber yang disalurkan oleh Kerajaan Persekutuan semata-mata.

"Dengan penganugerahan taraf autonomi kepada UMP yang akan disempurnakan esok, maka UMP berupaya mengembangkan lagi keupayaannya dalam bidang-bidang yang berpotensi dan pembentukan perkongsian pintar dengan rakan industri yang berwibawa adalah amat penting dalam konteks tersebut.

"Justeru, tumpuan khusus akan terus diberikan oleh pihak pengurusan universiti ini untuk memastikan UMP menerima manfaat daripada siri kolaborasi yang diwujudkan dengan pelbagai rakan industrinya dan pada masa yang sama memberikan pulangan nilai secara komplementari kepada rakan industri," katanya.

Beliau mengharapkan persefahaman yang dijalinan pada hari ini merupakan satu permulaan strategik yang bakal membuka lebih banyak ruang kerjasama dalam bidang-bidang lain pula selepas ini bagi manfaat kedua-dua pihak.

Majlis menyaksikan Profesor Dato' Dr. Daing Nasir dan Dekan FPI, Dr. Mohd. Ridzuan Darun menandatangani MoU mewakili UMP manakala Yayasan Sabah diwakili Pengarah Yayasan Sabah, Datuk Haji Sapawi Haji Ahmad dan Pengurus Kumpulan, Bahagian Pembangunan Pendidikan YS, Bahiwata S. Haji Mulia

Hadir sama dalam majlis Pengerusi Lembaga Pengarah Kolej Yayasan Sabah, Datuk Kamal D.E. Quadra, Ketua Eksekutif Kolej Yayasan Sabah, Datin Tarsiah T.Z. Zaman. Timbalan Naib Canselor (Akademik & Antarabangsa), Profesor Dato' Dr. Rosli Mohd. Yunos dan Timbalan Naib Canselor (Penyelidikan & Inovasi), Profesor Dr. Mashitah Mohd. Yusoff.